

SCHÜLER Helfen Leben

GODIŠNJI
IZVJEŠTAJ
2024

Sadržaj

Uvodna riječ i okvir djelovanja	3
Osvrt na društveno političku sliku Bosne i Hercegovine.....	4
Naš put i naši rezultati u 2024. godini.....	6
Evaluacija programa: šta kažu učesnici?	6
Omladinsko obrazovanje	7
Prvi koraci ka aktivizmu i volonterske akcije – kada ideje postanu stvarnost.....	7
Napredna edukacija – podrška za one koji već djeluju	8
SHL aktivisti – most između programa i zajednica.....	9
Akademija za mlade lidere – završena peta generacija	9
Promotivne aktivnosti – SHL karavani kroz BiH.....	9
Jačanje međunarodne prisutnosti i partnerstava	10
Humanitarni odgovor na poplave – solidarnost na djelu.....	10
Vidljivost i društvene mreže.....	11
Finansije i transparentnost.....	12
Završna riječ	13

Uvodna riječ i okvir djelovanja

Godina 2024. obilježena je nastavkom predanog rada Fondacije Schüler Helfen Leben (SHL) u Bosni i Hercegovini na osnaživanju mladih, izgradnji društvene odgovornosti i jačanju solidarnosti. Kroz naše programe obrazovanja, volonterizma, podrške omladinskim inicijativama i međunarodne saradnje, mladima pružamo prilike da se aktivno uključe u društvene procese, razvijaju svoje vještine i postanu pokretači pozitivnih promjena u svojim zajednicama.

U fokusu našeg rada tokom 2024. godine bile su tri ključne oblasti: obrazovanje mladih za aktivno građanstvo, volonterizam i solidarnost, te međunarodna razmjena i saradnja. U okviru obrazovnih aktivnosti, nastavili smo s razvojem i unapređenjem edukacijskih formata, usklađujući ih s potrebama mladih i društvenim izazovima u tranzicijskom kontekstu Bosne i Hercegovine. Volonterski angažman, kao temelj našeg djelovanja, dodatno smo osnažili putem lokalnih i regionalnih inicijativa koje povezuju mlade i doprinose razvoju zajednice. Kroz međunarodnu saradnju s partnerskim organizacijama iz Njemačke i regije, negovali smo vrijednosti interkulturalnog dijaloga i uzajamnog učenja.

Ovaj izvještaj pruža pregled ključnih aktivnosti, rezultata i postignuća SHL-a u Bosni i Hercegovini tokom 2024. godine. Kao i prethodnih godina, naš rad ne bi bio moguć bez snažne podrške i povjerenja brojnih partnera, lokalnih zajednica, škola i omladinskih organizacija, kao i predanosti mladih ljudi koji svakodnevno svojim djelovanjem mijenjaju društvo nabolje.

Osvrt na društveno političku sliku Bosne i Hercegovine

Kada su prije trideset godina, mladi ljudi iz Njemačke dolazili u našu državu da pomognu, da se solidariziraju, da izraze podršku svojim vršnjacima (srednjoškolcima), vjerujemo, da nisu mogli ni pomisliti da se stanje svijesti neće znatno promijeniti u odnosu na te godine. Vjerujemo isto tako da svi oni jesu veoma dobro upućeni u društvene i političke tokove naše zemlje. I dalje se zanimaju za ljude koji nisu njihovi sugrađani, štaviše, neki i dalje aktivno promoviraju priču koja se dogodila prije trideset godina i s čijim zapletom i ishodom realno nisu imali ništa. Priča je to koja ulazi u DNK kod i koja kao takva ne može se lako izbrisati.

Iako se nije pohvalno tako često vraćati na godine koje su prošle i stalno ih vraćati u prvi plan, svjedočimo da se takvo što događa i na „drugoj strani“ Europe. Vrijeme u kojem živimo i egzistiramo nosi sa sobom velike promjene. Od ogromnih tehnoloških otkrića do degradirajućih kulturoloških i društvenih podbačaja. Teško je spojiti ove dvije komponente ali izgleda da je to fenomen koji će obilježiti 21. stoljeće.

Godina 2024. može se definirati kao godina koja je donijela pregršt promjena u našem društvu ali i šire. Početkom godine, tačnije u martu 2024. Europska Komisija¹ predložila je otvaranje pregovora s Bosnom i Hercegovinom oko ulaska u Europsku Uniju. Ova odluka je kratko zasjala na bh političkom nebu jer su uskoro

nakon iste počela previranja bh političara na sklapanju povoljnih političkih poteza.

U maju 2024. Generalna skupština UN-a usvojila je Rezoluciju o Srebrenici². Za usvajanje su glasale 84 zemlje, 19 je bilo protiv, uz 68 suzdržanih. Iako u Bosni i Hercegovini postoji zakon koji tretira negiranje genocida, a kojeg je u svojim odlazećim danima donio visoki predstavnik Valentin Inzko 2021. godine³, situacija se nije znatno poboljšala nakon odluke o usvajanju Rezolucije. Neke radikalnije mjere su započete od strane Republike Srpske odmah nakon usvajanja. Početkom nove školske godine 2024/2025 (mjesec septembar 2024.) na stranici Republičkog pedagoškog zavoda RS objavljen je izmijenjeni nastavni program u kojem se u sklopu teme „Republika Srpska i Odbrambeno-otadžbinski rat“⁴ spominju imena ratnih zločinaca Radovana Karadžića i Ratka Mladića. „Ličnosti poput Ratka Mladića i Radovana Karadžića, kao i drugih, predstavljaju osobe koje su u periodu koji se izučava, obavljali značajne dužnosti u vojnom i političkom životu Republike Srpske, te se stoga ne mogu izostaviti prilikom predstavljanja događaja koji se odnose na nastanak Republike Srpske i Odbrambeno-otadžbinski rat“, naveli su u izjavi u navedenom mediju. Ono što se ne spominje u nastavnom programu RS je kako su i za šta osuđene te ličnosti.

Godinu 2024. obilježile su nemile scene i prizori ubojstava⁵ i nasilja u školama kao i sve većeg broja femicida u našoj zemlji. Na samom početku nove školske godine u BiH su počele pristizati anonimne dojave o bombama⁶ u javnim institucijama i školama. Dojave su dolazile sinkronizirano, selektivno i ciljano. Gotovo svakodnevno, nekoliko mjeseci, djeca iz osnovnih i srednjih škola izlazili bi iz svojih klupa i napuštali nastavu dok se ne bi utvrdilo sigurno stanje u učionicama škola. Dojave o bombama su poremetile cjelokupni sistem nastave te su škole koje su bile u ovom krugu morale nadoknaditi nastavu vikendom ili praznicima. Na samom kraju godine 2024., nastavnici iz HN kantona stupili su u štrajk kojim su tražili od

¹ Bosni i Hercegovini otvoreni pristupni pregovori sa EU; Pristupljeno 19.02.2025.; Link: https://www.mvp.gov.ba/aktuelnosti/saopštenja/default.aspx?id=51705&template_id=16&pageIndex=1

² General Assembly Adopts Resolution on Srebrenica Genocide, Designating International Day of Reflection, Commemoration; Pristupljeno 05.03.2024.; Link: <https://press.un.org/en/2024/ga12601.doc.htm>

³ Odluka visokog predstavnika kojom se donosi Zakon o dopuni Kaznenog zakona Bosne i Hercegovine; Pristupljeno 06.03.2025.; Link: <https://www.ohr.int/odluka-visokog-predstavnika-kojom-se-donosi-zakon-o-dopuni-kaznenog-zakona-bosne-i-hercegovine/>

⁴ Oglasilo se Ministarstvo iz RS: Djeca će u udžbenicima učiti o Karadžiću i Mladiću, ali ne i o genocidu i brojnim presudama; Pristupljeno 05.03.2025.; Link: <https://n1info.ba/vijesti/oglasilo-se-ministarstvo-iz-rs-a-djeca-ce-u-udzbencima-uciti-o-karadzicu-i-mladicu-ali-ne-i-o-genocidu-i-brojn timer-presudama/>

⁵ Žrtve iz Sanskog Mosta su ubijene na različitim lokacijama u školi: "Od danas više niko nije isti"; Pristupljeno 06.03.2025.; Link: <https://www.klix.ba/vijesti/bih/zrtve-iz-sanskog-mosta-su-ubijene-na-razlicitim-lokacijama-u-skoli-od-danas-vise-niko-nije-isti/240822043>

⁶ Maloljetnik osumnjičen za 49 lažnih dojava o bombama u Sarajevu smješten u popravni dom; Pristupljeno 06.03.2025.; Link: <https://www.slobodnaevropa.org/a/sarajevo-lazne-dojave-bombama-bih/33162272.html>

Vlade HNK da ispoštuju njihov zahtjev o povećanju primanja prosvjetnih radnika. Nakon jednomjesečnog štrajka Općinski sud u Mostaru donio je Rješenje⁷ kojim se isti obustavlja te izrekao naredbu da se prosvjetari moraju vratiti na posao.

U oktobru mjesecu 2024. godine, samo par dana pred lokalne izbore, Bosnu i Hercegovinu su pogodile prirodne nesreće (poplave i klizišta)⁸ na područjima općina Jablanica, Konjic, Kreševo, Fojnica i Kiseljak. Kao rezultat ovih katastrofalnih događanja je 27 umrlih, preko 3,000 onih koji su direktno oštećeni, preko 1,000 domaćinstava oštećenih, 10 javnih zgrada oštećeno, preko 800 domova uništeno.

Pored činjenice da je Bosna i Hercegovina podijeljena država te da se još uvijek borimo s pomirenjem i prihvaćanjem kako realnosti u kojoj živimo tako i činjenice da „moramo“ živjeti jedni s drugima, gotovo svakodnevno se suočavamo s problemima koji se tiču pukog opstanka svakog čovjeka. Politiziranjem svake društvene pojave ne odmičemo se mnogo od atmosfere koja je bila aktualna prije trideset godina.



⁷ Potvrđeno: Sud zabranio štrajk prosvjetara u HNK, nastava kreće sutra; Pristupljeno 06.03.2025.; Link: <https://mostarski.ba/potvrđeno-sud-zabranio-strajk-prosvjetara-u-hnk-nastava-krece-sutra/>

⁸ IOM Situacioni izvještaj: 2024 Odgovor na katastrofalne poplave i klizišta - Fokus na raseljene (26. decembar 2024.); Pristupljeno: 17.02.2025.; Link: https://bih.iom.int/sites/g/files/tmzbd11076/files/documents/2024-12/2024-flood-and-land-slide-response-situation-report-26-december_final-bcs.pdf

Naš put i naši rezultati u 2024. godini

U skladu s ciljevima Fondacije Schüler Helfen Leben, tokom 2024. godine implementirali smo i podržali ukupno **57 aktivnosti** koje su **direktno uključile 789 mladih ljudi iz 51 zajednice** širom Bosne i Hercegovine. Ove aktivnosti su obuhvatile **edukativne seminare, volonterske akcije i lokalne inicijative** koje su mladima omogućile da aktivno oblikuju svoje zajednice.

Evaluacija programa: šta kažu učesnici?

U novembru 2024. godine provedena je **ex-post evaluacija** programa Omladinskog obrazovanja SHL-a. Kroz online anketu i kvalitativna pitanja obuhvaćeno je **70 mladih** iz cijele Bosne i Hercegovine koji su učestvovali u SHL seminarima i aktivnostima tokom godine. Rezultati su nam pokazali:

Motivacija i angažman:

- 93% učesnika izjavilo je da ih je učešće motivisalo da se angažuju u lokalnim zajednicama.
- 88,6% kaže da su svojim angažmanom inspirisali druge vršnjake da se aktiviraju.
- Glavni motivatori za angažman su bili: druženje i zajednički rad na rješavanju problema (45,7%) i lični razvoj (24,3%).

Kompetencije i znanja:

- 98,6% učesnika smatra da su kroz SHL edukacije stekli znanja i vještine koje nisu mogli dobiti u formalnom obrazovanju.
- 94,3% koristi ta znanja i nakon seminara.

Interkulturalna iskustva i mreže:

- 90% mladih je kroz SHL aktivnosti naučilo nešto novo o vršnjacima iz drugih etničkih grupa.
- 91,4% ih je steklo prijatelje s kojima planiraju dalji angažman.

Vidljivost i dugoročnost projekata:

- 84,3% izjavljuje da su njihove projektne ideje i dalje prisutne u zajednici nakon implementacije.
- Njihovi projekti su u 85,7% slučajeva poslužili kao inspiracija drugima.

Kvalitativna refleksija:

„Tokom SHL aktivnosti, prvi put sam samostalno upravljala finansijama jednog volonterskog projekta — to mi je značajno pomoglo u daljem radu u nevladinom sektoru.“ — Učesnica, EPE 5
Ovi nalazi jasno potvrđuju da SHL-ov obrazovni program ima snažan uticaj na osnaživanje mladih, jačanje građanske svijesti i podsticanje konkretnih promjena u lokalnim zajednicama. Program mladima ne nudi samo prostor za učenje, već im pruža i konkretne alate, kontakte i podršku za realizaciju vlastitih ideja koje nastavljaju živjeti i nakon završetka projekta.



SHL u službi mladih - obrazovanje, akcije i solidarnost u 2024.

Omladinsko obrazovanje

SHL je kroz program Omladinskog obrazovanja imao nekoliko različitih aktivnosti. Ovaj program podržava mlade ljude različitih dobnih skupina, od 14 do 35 godina. Program je namijenjen za sve, od onih čije je učešće u društvenim tokovima veoma aktivno i uspješno pa sve do onih koji nemaju nikakvog iskustva u tom polju. Realizacija ovih aktivnosti se odvija putem održavanja seminara te volonterskih akcija koje uslijede nakon seminara.

Prvi koraci ka aktivizmu i volonterske akcije – kada ideje postanu stvarnost

U 2024. godini, SHL je organizovao **četiri seminara** (jedan uživo i tri online) za mlade učesnike (14–16 godina), s fokusom na **kritičko razmišljanje, razumijevanje društva i osnaživanje za volonterski angažman**. Kroz ove seminare prošlo je **79 učesnika**, a kao rezultat organizovano je **11 volonterskih akcija**.

Mladost, kreativnost i solidarnost bile su okosnice volonterskih projekata koje su mladi, inspirisani SHL-ovim edukacijama, proveli u svojim zajednicama. Od bio-ruža iz Kiseljaka, renovirane Info sobe u Ključu, do uređenja obale u Donjem Vakufu – svaka akcija svjedoči o snazi zajedničkog djelovanja. Mladi su pokazali da čak i s ograničenim sredstvima, uz timski duh, mogu stvoriti prostore dostojne divljenja i korisne za cijelu zajednicu.

Sjajna akcija **mladih srednjoškolaca iz Kiseljaka** koji ne samo da su inovatori nego su kroz svoju akciju pokazali značajnu humanost na djelu. Razvili su „bio ruž za usne“ kojeg su nazvali svojim „razrednim patentom“. Ovi mladi inovatori odlučili su ne samo da ga naprave, već i da ga prodaju po i dalje pristupačnoj ali dvostrukoj cijeni u odnosu na početno ulaganje. Sav novac

koji su prikupili donirali su lokalnoj nevladinoj organizaciji koja brine o djeci s posebnim potrebama u Kiseljaku.



U Ključu, grupa srednjoškolaca odlučila je da preuzme stvar u svoje ruke i renovira „Info sobu“ u Gimnaziji, pretvarajući je u mjesto puno informacija i dobrodošlice za sve učenike. Ovaj projekt nije bio samo neki brzinski zadatak – to je bio pravi rad iz ljubavi koji je spojio njihovu kreativnost, timski rad i zdrav razum da bi napravili pozitivnu promjenu u svojoj školi. Oko 25 učenika, iz različitih razreda i s različitim interesima, proveli su dva puna dana radeći zajedno kako bi transformirali taj prostor. Zajedno su razmišljali, planirali raspored i čak sami nabavili materijale. Sa četkama, posterima i zajedničkom vizijom, oživjeli su sobu dodajući šarene elemente, oglasne ploče i info displeje.




U Donjem Vakufu je deset mladih volontera preuzelo zadatak da renovira zapušteni dio obale rijeke Vrbas. Ovo mjesto, omiljeno okupljalište mladih van gradske vreve i kafića, godinama je bilo zapostavljeno i u prilično lošem stanju. Volonteri su odlučno prionuli na posao, posvećeno čisteći i uređujući prostor kako bi ga učinili ugodnijim i pristupačnijim. Izgradili su i klupu koja sada čini mjesto ugodnim.

Sve ove priče svjedoče onim lijepim stvarima koje možemo ostvariti samo uz solidarnost i zajedničko djelovanje, timski i u jedinstvu. Imati zajedničke interese možda s čak i oprečnim razmišljanjima o pojedinim koracima, uz dijalog i sagledavanje općeg dobra, možemo pozitivno djelovati na okolinu u kojoj boravimo. Mladi ljudi koji zajedničkim, volonterskim naporima mijenjaju svoju lokalnu zajednicu snažan su primjer onoga za šta se SHL zalaže i podržava. Više o podržanim akcijama možete pronaći na linku.



Napredna edukacija – podrška za one koji već djeluju

Za mlade koji su već aktivni u civilnom sektoru, SHL je organizovao **pet dodatnih edukacija** (četiri online i jedna uživo) sa **114 učesnika iz 40 lokalnih zajednica**. Ovi seminari bili su usmjereni na razvoj ličnih i organizacijskih kapaciteta, umrežavanje i osnaživanje za strateško djelovanje u zajednici. Za SHL ova vrsta obrazovanja je veoma važna zato što daje snagu mladima koji su već na jednom dijelu puta koje vodi jačem civilnom angažmanu ali im nedostaje podrška. Ohrabrivati mlade ljude i biti im podrška u njihovom razvoju misija je SHL-a. Mladi ljudi koji prođu kroz ove edukacije kasnije bivaju treneri i edukatori onima koji dolaze.



SHL aktivisti – most između programa i zajednica

SHL aktivisti čine posebnu grupu mladih koji kontinuirano djeluju kao veza između SHL-a i lokalnih zajednica. Tokom godine održana su **četiri susreta sa 20 aktivista iz 11 općina**. Njihova uloga je identifikacija potreba mladih, širenje SHL-ovih programa i poticanje novih inicijativa.



Akademija za mlade lidere – završena peta generacija

U maju 2024. obilježen je završetak pete generacije Akademije za mlade lidere u civilnom društvu. Program koji se implementira već gotovo jednu deceniju te iza sebe ima pet generacija studenata. Važnost ovog programa se očituje u njegovoj diverzificiranosti kao i sveobuhvatnosti njegovog programa. **Akademija ima tri segmenta kroz koja djeluje – predavanja/edukacije, - projekti/inicijative te – praksa.** U 2024. godini na Akademiji su održana dva modula predavanja s temama od tranzicijske pravde, prava i morala do kritičkog čitanja i pisanja. Pored predavanja na Akademiji su studenti imali organizirani posjet džamiji Istiklal i franjevačkom samostanu i crkvi sv. Ante u Sarajevu. Održana je i sjednica Vijeća profesora te objavljeno **istraživanje „Sa svojih deset prstiju: Šta mlade motivira – strast ili plata?“**. Peta generacija studenata na Akademiji okrunjena je u mjesecu maju 2024. diplomama i proslavom dodjele istih. Trenutak je to kada i svi oni koji su pohađali taj program shvate kroz kakav su proces prošli i šta su sve spoznali na tom putu. Radujemo se novoj generaciji i novim polaznicima da ponovno i iznova doživimo ovaj osjećaj sreće i ispunjenja na njihovim licima. Više o programu Akademije možete pronaći na linku.



Promotivne aktivnosti – SHL karavani kroz BiH

Kao jedna od najdinamičnijih aktivnosti SHL-a jesu svakako Promotivne misije odnosno obilazak i druženje SHL-ovih radnika i aktivista s mladim ljudima iz srednjih škola na području cijele Bosne i Hercegovine. U 2024. godini održana su tri takva putovanja i to u gradove Jablanica, Mostar, Stolac, Trebinje, Bileća, Doboj Istok, Doboj, Teslić, Usora, Zavidovići, Zenica, Kakanj, Bihać, Bosanska Krupa, Ključ, Sanski Most, Mrkonjić Grad, Bugojno i Donji Vakuf. Susreli smo se s više od **140 mladih ljudi** te s njihovim **profesorima i pedagozima**. Cilj ove aktivnosti je zapravo upoznavanje mladih s programima SHL-a te unapređivanje suradnje sa školama u BiH i razvijanje i održavanje dobrih odnosa s mladima iz manjih lokalnih zajednica.



Jačanje međunarodne prisutnosti i partnerstava

Fondacija Schüler Helfen Leben je u junu 2024. godine, a na prijedlog Odbora za nevladine organizacije, dobila poseban **savjetodavni status pri Ekonomskom i socijalnom vijeću (ECOSOC) UN-a**. Ovaj status nam omogućuje da se na više načina uključimo u ECOSOC i rad njegovih tijela. SHL će se moći prijaviti i sudjelovati na sjednicama, događanjima, konferencijama i aktivnostima Ujedinjenih naroda. Također, ovaj status nam omogućava da odredimo ovlaštenog predstavnika kao promatrača na javnim sastancima ECOSOC-a i njegovih pomoćnih tijela, Vijeća za ljudska prava i, pod određenim uvjetima, Opće skupštine i drugih međuvladinih tijela Ujedinjenih naroda.

SHL je u 2024. godini imao suradnju s **OFAJ/DFJW** francusko-njemačkim uredom za mlade te su kroz zajednički angažman razvijena i implementirana brojna strateška partnerstva i inicijative za jačanje regionalne suradnje i angažmana mladih. Suradnje su uspostavljene s partnerskim organizacijama iz Francuske i Njemačke kako bi se olakšali trilateralni događaji i sastanci regionalne suradnje. Održana je obuka o trilateralnim razmjenama u mjestu Mali Idoš, čime je dodatno učvršćena osnova za zajedničke inicijative. Prvi regionalni sastanak u Sarajevu, pod nazivom "Solidarnost za akciju na zaštiti okoliša i održivu mobilnost" (decembar 2024.) uspješno je organiziran online, s 35 aktivnih učesnika. Sastanak je ostvario svoje glavne ciljeve, a to su unapređenje dijaloga i suradnje među učesnicima.

Humanitarni odgovor na poplave – solidarnost na djelu



U oktobru 2024. godine, Bosnu i Hercegovinu pogodile su teške poplave koje su prouzrokovale nekoliko klizišta. Najpogođenija područja bila su općine **Jablanica, Konjic, Kiseljak, Kreševo i Fojnica**. Nažalost, u ovoj prirodnoj katastrofi **izgubljeno je 27 života**. Za samo jednu noć poplave i masivna klizišta su uništila domove ostavljajući katastrofu za sobom. Ishod ove katastrofe, kao što je gore navedeno, bio je **27 izgubljenih života, više od 3.000 ljudi direktno pogođenih, više od 1.000 oštećenih domaćinstava, 10 oštećenih javnih zgrada i više od 800 uništenih domova**. Poplave i klizišta uništile su dio željezničke pruge, čime je oštećen ne samo javni prijevoz za putnike, već i potrebe industrije i ekonomije Bosne i Hercegovine. SHL, u duhu solidarnosti, odmah je obustavio svoje dnevne aktivnosti, a zaposleni su počeli prikupljati i organizirati pomoć za pogođene u Jablanici, Fojnici, Konjicu, Kreševu i Kiseljaku.



Uz pomoć prijatelja i dobrih ljudi iz Njemačke, SHL je prikupio 13.258,57 KM, što je distribuirano kroz humanitarnu pomoć najugroženijim grupama u pogođenim područjima. U prva dva obilaska, SHL tim je donio humanitarnu pomoć u vidu hrane, odjeće, lijekova i vode u Fojnicu (Gojevići, Bakovići) i Kreševo. Zatim je organizirana pomoć za ugroženu djecu iz općine Konjic, koja su imala priliku kupiti potrebnu zimsku odjeću i obuću. Djeci osnovne škole u Seonici, Buturović Polje, pružena je prilika da sudjeluju u festivalu "Mali Šlager" te da posjete

svoje vršnjake u osnovnoj školi u Čelebićima. Pored ovih aktivnosti, škola iz Seonice obavijestila je SHL da im je potrebna pitka voda, koja je dostavljena kroz nekoliko dana. Uz podršku SHL-a, srednja škola u Jablanici organizirala je edukativne radionice za mlade srednjoškolce, na kojima su izrađivali balzame, sapune i kreme, kao i radionicu za oslikavanje dekupaž tehnikom. Pored ovih radionica, školi je donirana i fitness klupa za školsko dvorište. Srednjoj školi u Fojnici je bio potreban zvučni sistem za njihove svakodnevne aktivnosti, a SHL im je omogućio ovu kupovinu. Prva upotreba bila je na školskoj božićnoj predstavi u decembru 2024. godine.

U srcu misije SHL-a i dalje ostaje humanitarni rad, kao nešto iz čega je organizacija izrasla, i stoga ne može ignorirati potrebe ugroženih ljudi, posebno kada su u pitanju mladi i djeca.



Vidljivost i društvene mreže

Sve ono što SHL radi i podržava pokušavamo prenijeti i široj publici kako bismo ih mogli pravovremeno informirati o svim aktivnostima koje su se desile te i o onima koje se najavljuju. Koristimo kanale društvenih mreža Facebook, Instagram, LinkedIn gdje prenosimo sve važne informacije o našem djelovanju. Trenutno, oko 49,2% naših pratitelja na društvenim mrežama čine osobe u dobi od 18 do 24 godine, a oko 30,3% su osobe u dobi od 25 do 34 godine. Sekundarna ciljna skupina su nastavnici i profesori, iskusniji radnici s mladima te roditelji učesnika, koji zajedno čine oko 10% ukupnog broja pratitelja. Najveći dio ciljne skupine čine

učenici srednjih škola, oko 50% pratitelja. Manji segment publike su studenti, koji čine do 30% pratitelja. Kada govorimo o spolu 70% pratitelja pripada ženskoj populaciji.

U 2024. godini objavili smo 382 javne objave na društvenim mrežama i SHL web stranici, koje su dosegle do 502.407 osoba. U prosjeku, imali smo oko 30 objava mjesečno, koje su dosegle do oko 40.000 pojedinaca mjesečno putem SHL-ovih društvenih mreža.



Finansije i transparentnost

U 2024. godini SHL je nastavio sa praksom transparentnog izvještavanja i planskog budžetiranja svojih aktivnosti. Zahvaljujući uspostavljenom sistemu finansijskog planiranja svi programi su imali jasno definisane budžete koji su omogućili bolje razumijevanje troškova, kao i efikasnije planiranje i izvještavanje prema donatorima.


Raspodjela budžeta po programima

U 2024. godini, ukupni budžet Fondacije Schüler Helfen Leben u Bosni i Hercegovini iznosio je **572.354,05 KM**, raspoređen je prema ključnim programskim linijama koje odražavaju strateške prioritete organizacije:

- **Omladinsko obrazovanje (32%)** – Obuhvata aktivnosti seminara, edukacija i rada sa srednjoškolcima.
- **Akademija za mlade lidere (29%)** – Fokusirana na razvoj mladih lidera kroz intenzivne višemjesečne programe.
- **Međunarodna saradnja (15%)** – Uključuje razmjenu znanja i iskustava sa partnerima iz regije i Evrope.

- **Promocija i vidljivost (11%)** – Aktivnosti usmjerene na javnu komunikaciju i podizanje svijesti.
- **Logistika i operativna podrška (11%)** – Tehnički i organizacijski troškovi za realizaciju programa.
- **Humanitarna pomoć (2%)** – Interventna podrška ugroženim grupama u kriznim situacijama.

Ovakva raspodjela odražava našu posvećenost dugoročnim obrazovnim i omladinskim ciljevima, uz istovremeno očuvanje solidarnosti i odgovora na društvene potrebe.



Završna riječ

Zahvaljujemo se svim mladim ljudima, saradnicima, partnerima i donatorima koji su u 2024. godini vjerovali u **snagu mladih**, njihovu kreativnost, otpornost i sposobnost da donesu pozitivne promjene u svojim zajednicama. Vaše povjerenje, podrška i zajednički rad bili su ključni za ostvarenje rezultata koje prikazujemo u ovom izvještaju.

Ovaj izvještaj nije samo zbir podataka i procenata – on je **svjedočanstvo priča** o hrabrosti, učenju, solidarnosti i svakodnevnom aktivizmu mladih širom Bosne i Hercegovine. Kroz njihove inicijative, dijaloge i male, ali značajne pobjede, podsjećaju nas na to koliko vrijedi ulagati u novu generaciju.

SHL ostaje **duboko posvećen** podršci mladima u njihovoj borbi za društvo koje se temelji na **solidarnosti, pravdi, međusobnom poštovanju i demokratskom dijalogu**. U vremenu izazova, vjerujemo da su upravo mladi ti koji mogu biti nosioci promjene – ne samo u budućnosti, već i **sada**.

Zajedno nastavljamo graditi prostore u kojima mladi mogu slobodno misliti, govoriti i djelovati.



SCHÜLER
HELFEN
LEBEN